

宋·張

根撰

易學叢
書續編

吳園周易解

廣文書局印行

中華民國六十三年九月初版

易學叢
書續編

吳園周易解

裝精全一冊定價新台幣：一百八拾五元

版權所有
不准翻印

撰者 張根

發行人 王道榮

發行所 廣文書局有限公司

經銷者 全國各大書局

臺北市羅斯福路二段九號之三
郵政劃撥二一九九帳號
電話三四九六六〇號

內政部出版業登記證內版台業字第一三二四號

欽定四庫全書提要

吳園周易解九卷

朱張根謨根字知常德興人年二十一登進士第大觀中官至淮南轉運使以朝散大夫終於家事蹟具宋史本傳是書末有其孫垓跋跋語原文不全稱爲先祖太師者其子燾孝宗時爲參知政事追贈官也根所撰述甚多垓跋稱有宋朝編年數百卷五經諸子皆爲之傳注晁公武讀書志載有春秋指南十卷今亦未見惟此易解僅存明祁承燦家有其本此

爲徐氏傳是樓所鈔自說卦傳乾健也節以下蠹蝕殘缺攷通志堂經解之中遺而不刻豈得本於刻成後耶書中次第悉用王弼之本詮義理而不及象數不襲河洛之談註文簡略亦無支蔓之弊末附錄序論五篇雜說一篇皆論繫辭又泰論一篇專論泰卦於經義頗有發明而泰論一篇於人事尤三致意焉蓋作於徽宗全盛時也亦可云識微之士矣

易上繫大衍之數以下經文五代以前皆如注疏本
未之有易也安定胡氏始疑其有脫落倒錯自爲考
定其詳見於倪天隱所述口義程子易傳不注繫辭
其經說曰自天一至地十合在天數五地數五上簡
編失其次也其言卽本之胡氏而朱子因之移易前
後遂爲今本夫天地之數卽五行生成之義亦卽大
衍之數鄭虞以來其說從同宋儒雖推行河洛而五
十五之數亦非有異也善夫橫渠張子之言易也其
注天一地二二十字謂此語當在天數五地數五處
然聖人之於書亦有不欲併一說盡慮易知則不復

研究故有易有難或在此說或在彼說然要終必見
但俾學者潛心此不欲輕易經文也顧自明以來讀
易惟主本義汴宋諸儒釋經舊文多爲竄亂如汲古
閣刻東坡易傳其文一與本義同豈可信哉卽知常
易解後篇殘闕胡廣諸人竟以本義補之曾未計朱
子之書非知常所得見也猶幸繫辭經文次第得仍
其舊斯可寶貴知常之名文獻通考誤作轅焦竑經
籍志誤作輶亦賴此本正之若其生當叔季主閭臣
諛上下相蒙方爲豐亨豫大之說獨能進泰卦之論
凜復隍之戒慎苞桑之防惓惓入告冀其君之一悟

時之一治也乃未幾而有北轅之難蘇洵所謂天下
被其禍而徒獲知言之名者也亦可慨也夫嘉興後
學錢儀吉識後

吳園周易解目錄

卷一

上經 乾 坤 屯 蒙 需
訟 師 比 小畜 履

卷二

上經 泰 否 同人 大有 謙
豫 隨 蠱 臨 觀

卷三

上經 噬嗑 賁 剝 復 无妄
大畜 頤 大過 坎 離

卷四

下經 咸 恆 睽 蹇 大壯 晉 明夷
家人 睽 蹇 解 損 益

卷五

下經
革
鼎
震
艮
漸
歸妹

卷六

下經
豐
旅
巽
兌
渙
未
節

卷七

繫辭解上

卷八

繫辭解下

卷九

說卦傳解

序卦傳解

雜卦傳解

附錄

序論

泰論

雜說

吳園周易解卷一

宋張根譔

上經

乾訟

坤師

屯比

蒙小畜

需

履

三三

乾下
乾上

乾元亨利貞

初九潛龍勿用

伯夷之事

九二見龍在田利見大人

仲尼之事

九三君子終日乾乾夕惕若厲无咎

文王之事

九四或躍在淵无咎

武王觀兵之事

九五飛龍在天利見大人

禹湯之事

上九亢龍有悔

穆王之事

用九見羣龍无首吉

堯舜之事

彖曰大哉乾元萬物資始乃統天雲行雨施品物流

形大明終始六位時成時乘六龍以御天乾道變化各正性命保合太和乃利貞首出庶物萬國咸寧

乾道无所不該四德特舉其應物之跡耳故有人君之象

象曰天行健君子以自強不息

帝之所興王之所成皆原於此

潛龍勿用陽在下也見龍在田德施普也終日乾乾反復道也或躍在淵進无咎也飛龍在天大人造也亢龍有悔盈不可久也用九天德不可爲首也

天爲剛德猶不干時况於人乎

文言曰元者善之長也亨者嘉之會也利者義之和也貞者事之幹也君子體仁足以長人嘉會足以合禮利物足以和義貞固足以幹事君子行此四德者故曰乾元亨利貞

四德所配惟乾爲然

初九曰潛龍勿用何謂也子曰龍德而隱者也不易乎世不成乎名遯世无悶不見是而无悶樂則行之憂則違之確乎其不可拔潛龍也

時命大謬而樂則行此所以爲聖人之隱

九二曰見龍在田利見大人何謂也子曰龍德而正